

# STOP!

Br. 1 | besplatan primjerak | januar/siječanj 2010.

str. 8

**TEMA BROJA - ORGANIZIRANI KRIMINAL**

Mr. sci. Edin Vranj

***Autokriminal kao oblik organiziranog kriminala u Bosni i Hercegovini***

**POLICIJSKA AKADEMIJA**

str. 20

**Izmjena koncepta osnovne policijske obuke**

**Učestvuj i Ti!**

**Izbor za "policajca godine"**

# IZBOR POLICAJCA GODINE

Federalno ministarstvo unutrašnjih poslova - Federalno ministarstvo unutarnjih poslova objavljuje oglas za izbor policajca godine.

Za izbor policajca godine mogu biti predloženi policijski službenici uposlenici Federalnog i kantonalnih ministarstava unutrašnjih poslova.

Pravo predlaganja po oglasu za izbor policajca godine imat će uposlenici Federalnog i kantonalnih ministarstava unutrašnjih poslova, građani, ministri kantonalnih ministarstava unutrašnjih poslova i komesari kantonalnih ministarstava unutrašnjih poslova.

Kriteriji za izbor policajca godine su: posebno iskazana profesionalnost, hrabrost i odlučnost.

Prijedlozi za izbor policajca godine trebaju sadržavati sljedeće podatke o predloženom kandidatu:

- ime i prezime policijskog službenika koji se predlaže za izbor policajca godine, naziv organizacije jedinice u kojoj je zaposlen, sa navođenjem razloga zbog kojih se predlaže za izbor policajca godine, te ime i prezime lica koje predlaže policijskog službenika, naziv organa u kojem je zaposlen i na kojem radnom mjestu (građanin koji predlaže policijskog službenika za izbor policajca godine na oglas treba navesti svoju adresu stanovanja, te svoj broj telefona).

Prijedlog kandidata za izbor policajca godine može se vršiti na sljedeći način:

- putem e-mail adrese Federalnog ministarstva unutrašnjih poslova: [najboljipolicajac@fmup.gov.ba](mailto:najboljipolicajac@fmup.gov.ba)
- pismom-dopisom koji se predaje na protokol ovog ministarstva, ili putem pošte na adresu: Federalno ministarstvo unutrašnjih poslova, ul. Mehmeda Spahe br. 7, Sarajevo, s obaveznom naznakom: prijedlog policajca godine.

Prijedlozi kandidata za izbor policajca godine mogu se predavati počev od dana objave ovog oglasa pa do 15. 2. 2010. godine.

Izbor policajca godine izvršit će Komisija za izbor koja će biti imenovana rješenjem federalnog ministra unutrašnjih poslova, a sačinjavat će je dva ministra unutrašnjih poslova, dva komesara, jedan predstavnik Federalnog ministarstva unutrašnjih poslova, jedan predstavnik medija, jedan predstavnik sindikata policije i jedan predstavnik akademske zajednice.

Policajac kojeg Komisija za izbor bude izabrala za policajca godine, drugoplasirani policajac, kao i trećeplasirani policajac će biti novčano nagrađeni.

Imena i prezimena kandidata koji budu izabrani za policajca godine će biti objavljena:

- u biltenu "Stop",
- na web-stranici FMUP-a,
- na oglasnim pločama Federalnog i kantonalnih ministarstava unutrašnjih poslova.

Nagrade izabranim policajcima će biti uručene na posebnoj svečanosti.

## Sadržaj

- 4 INTERVJU  
Muhidin Alić, federalni ministar unutrašnjih poslova
- 6 PREDSTAVLJAMO  
Nedim Aličković, Almir Dautović i Edin Zulić
- 7 Dani otvorenih vrata
- 8 TEMA BROJA  
Autokriminal kao oblik organiziranog kriminala u Bosni i Hercegovini
- 13 Odnosi s javnošću u radu agencija za provođenje zakona u BiH
- 17 PROJEKTI  
Borba protiv "ubice savremenog doba"
- 19 Nastupi Nogometne reprezentacije BiH
- 20 Izmjena koncepta osnovne policijske obuke

## Impresum

Federalno ministarstvo unutrašnjih poslova - Federalno ministarstvo unutarnjih poslova

**Glavni i odgovorni urednik:** Admir Katica, Federalno ministarstvo unutrašnjih poslova - Federalno ministarstvo unutarnjih poslova

**Zamjenik glavnog i odgovornog urednika:** Senad Muslić, Federalno ministarstvo unutrašnjih poslova - Federalno ministarstvo unutarnjih poslova

### Urednički odbor:

Federalna uprava policije  
MUP Unsko-sanski kanton  
MUP Posavski kanton  
MUP Tuzlanski kanton  
MUP Zeničko-dobojski kanton  
MUP Bosansko-podrinjski kanton  
MUP Srednjobosanski kanton  
MUP Hercegovačko-neretvanski kanton  
MUP Zapadnohercegovački kanton  
MUP Kanton Sarajevo  
MUP Kanton 10

- **Robert Cvrtek**  
- **Ale Šiljdedić**  
- **Josip Dominković**  
- **Izudin Šarić**  
- **Aldina Ahmić**  
- **Ševko Gušo**  
- **Sefir Baručija**  
- **Srećko Bošnjak**  
- **Damir Čutura**  
- **Irfan Nefić**  
- **Ivica Vrdoljak**

**Kreativni koncept, korektura i redaktura:** Rent a PR, info@rentapr.ba

**DTP:** M Line d.o.o., info@mline.ba

**Lektura:** Lejla Mašić

**Štampa:** Amos-graf

**Tiraž:** 9000 primjeraka

**Adresa:** Mehmeda Spahe 7, 71000 Sarajevo, Bosna i Hercegovina

T +387 33 280-020, lokali: 3322, 3314, 3106 i 3107

F +387 33 280-020, lokal 3321

E stop@fmup.gov.ba

### Fotografija na naslovnoj strani

Edita Čolaković i Mirsad Čemernica, pripadnici Jedinice za podršku Kantona Sarajevo  
foto: Edina Delalić



## Riječ urednika



### STOP – Magazin koji pokreće

#### Dobrodošli!

Policijski magazin „STOP“ namijenjen je prvenstveno vama, policajcima, i želja nam je da vi ovaj magazin osjetite kao svoj. Naravno i svi ostali su dobrodošli, jer na ovom mjestu će moći pronaći pregršt zanimljivih informacija koje se možda drugdje ne mogu naći. Ovaj magazin će biti daleko od još jednog policijskog biltena koji bi, kako možda neki očekuju, trebao davati statističke podatke, suhoparno izvještavati o policijskim akcijama i krivičnim prijavama.

Izvještavat ćemo i o tome, ali najprije želimo da ovaj magazin na interesantan način predstavi ono što je duša i srce naše policije. To su ljudi, profesionalci, majke i očevi, građani našeg društva koji su na sebe uzeli teret zaštite sigurnosti svih nas. Zato su oni najbolji među nama. Najmanje što zaslužuju je da budu spomenuti.

U ovom broju ćemo pokrenuti akciju za izbor najboljeg policajca Federacije Bosne i Hercegovine kojem ćemo odati priznanje za njegov rad i adekvatno ga nagraditi. Predstavljat ćemo naše uzorne profesionalce, policajce, komandire, rukovodioce policije, ministre. Nećemo se tu zaustaviti kada je u pitanju vraćanje policijskog dostojanstva koje se negdje malo izgubilo i treba ga ponovno pronaći.

Naravno, posvetit ćemo dužnu pažnju najvažnijim strateškim aktivnostima policije, prilikama koje se ukazuju i rizicima kojima smo izloženi.

U prvom broju želimo naglasiti možda najvažnije sigurnosno pitanje koje ne samo da ugrožava naš svakodnevni život, naše plaće, naš standard, već prijeti da postane novi stub vlasti i tako ugrozi same temelje naše države. Ovakvo stanje nije ekskluzivitet samo naše zemlje. Priroda organizovanog kriminala je svugdje ista, ali kod nas dobija na snazi zbog neuređenosti i iscjepkanosti svih društvenih mehanizama potrebnih za uspješnu borbu protiv ove pojave. Zato u ovom prvom broju predstavljamo ono što smo zajednički učinili i što namjeravamo učiniti kako bismo bili snažan takmac nosiocima organizovanog kriminala kod nas.

Magazin STOP će izlaziti svaka tri mjeseca, što je dovoljno za početak. Sretan sam da je ova ideja, koja već odavno postoji, dobila podršku svih policijskih agencija u Federaciji Bosne i Hercegovine, pa stoga mogu s pravom reći da je ovo još jedan naš zajednički projekt koji ćemo zajednički i na partnerskim osnovama ostvariti.

Pa nek je onda svima nama SRETNO!!!

Admir KATICA

## Muhidin Alić, federalni ministar unutrašnjih poslova Policajac je najbolji građanin!

Razgovarala: Alma ĐOZO

Foto: Edina Delalić

Jedinstvo policije je model jedinstvenog društva -  
Organizovani kriminal - prioritet broj jedan

Federalno ministarstvo unutrašnjih poslova u posljednje vrijeme pokreće i ostvaruje značajne projekte bitne za sigurnost građana. Ovi projekti su rezultat jedinstva i partnerskog odnosa federalnog i kantonalnih ministarstava unutrašnjih poslova.

Interni magazin „STOP“ je također zajednički projekt namijenjen prvenstveno svim pripadnicima Federalnog i kantonalnih ministarstava unutrašnjih poslova.

O ovome ali i o drugim aspektima rada Federalnog ministarstva unutrašnjih poslova razgovarali smo sa federalnim ministrom Muhidinom Alićem.

**Gospodine Aliću, često čujemo ocjene da je stanje sigurnosti loše i da se građani ne osjećaju sigurno. S druge strane, svjedoci smo mnogih aktivnosti koje policija poduzima kako bi stanje bilo drugačije. Kakva je Vaša ocjena?**

Kada se procjenjuje stanje sigurnosti u bilo kojoj zemlji, glavni parametri za to su: kriminalitet, javni red i mir, sigurnost u saobraćaju. Gledajući statistički, stanje sigurnosti je zadovoljavajuće i ono ne iskače iz višegodišnjih trendova. Međutim, ono što nas u policiji mora više zanimati je osjećaj sigurnosti građana. Taj osjećaj je najvažniji za mjerenje efikasnosti našeg rada. U tom smislu, očigledno je da su građani u našoj zemlji postali mnogo osjetljiviji na pitanja sigurnosti nego što je to prije bio slučaj. Pitanje sigurnosti je postalo jedno od osnovnih pitanja kvaliteta života građana.

Moje je mišljenje da je ovaj osjećaj nesigurnosti u direktnoj vezi sa tzv. uličnim kriminalom, zloupotrebom droga, upotrebom oružja na ulici, bezobzirnim ubistvima. A sve to je opet u neraskidivoj vezi s organizovanim kriminalom i korupcijom, koji su glavni uzrok svega što građani opažaju i

osjećaju kao gubitak sigurnosti.

Zato je borba protiv organizovanog kriminala i korupcije osnovni izazov sigurnosti u budućnosti.

**U više navrata ste izjavljivali o povezanosti organizovanog kriminala, korupcije s ovim tzv. uličnim kriminalom. Ako je to tako, šta uraditi da bi se stanje popravilo i da li je uopće moguće popraviti to stanje?**

Borba protiv organizovanog kriminala nije jednostavan posao. Tome treba prići strateški, sa jasnim ciljevima i jedinstvenim pristupom svih. Kada kažem svih, onda mislim na policiju, pravosuđe, nevladine organizacije, medije, građane. Svi mi možemo doprinijeti da organizovani kriminal bude manji problem za naše društvo.

Mi smo do sada kroz projekt „Organizaciono, kadrovsko i materijalno-tehničko jačanje policije u borbi protiv organizovanog kriminala“ slijedili upravo takvo polazište, a kao osnovne principe smo uzeli: obučiti, opremiti i motivirati.

Uložili smo više od 1.200.000 KM u edukaciju policijskih službenika kroz postdiplomski specijalistički studij „Zakonitost u istraživanju i dokazivanju organizovanog kriminala“. Također,



Muhidin Alić: Borba protiv organizovanog kriminala nije jednostavan posao

stalno se održavaju i specijalistički kursevi na našoj Policijskoj akademiji vezani za borbu protiv organizovanog kriminala.

Za potrebe Federalne uprave policije smo nabavili suvremenu policijsku opremu za borbu protiv organizovanog kriminala i isto tako značajno poboljšali materijalni položaj policajaca iz naše nadležnosti

**Kakvi su planovi u skorijoj budućnosti?**

Cilj nam je cjelokupno osnaženje policije kada je u pitanju ono što u temelju ugrožava i našu državu i naše građane. Ubrzo planiramo provođenje jedne sveobuhvatne javne kampanje koja treba osvijestiti sve nas o kakvom obliku kriminala se radi, koliko je potrebno jedinstvo svih nas da bismo

se odbranili od te pojave. Želimo sa građanima, predstavnicima medija, nevladinih organizacija, pravosuđa, politike i svima ostalim koji mogu biti od pomoći, izgraditi vrlo jasne, otvorene i partnerske odnose. To, s jedne strane, može biti i opasno zbog kontroverznosti ovog oblika kriminala, ali, s druge strane, ne postoji drugi način za izgradnju fronta borbe protiv organizovanog kriminala.

Pored toga, imamo izgrađene projekte edukacije policije o temi: „Borba protiv organizovanog kriminala“ kroz kvalitetne specijalističke kurseve na našoj Policijskoj akademiji. Nastavit ćemo u skladu sa procjenama policije s nabavkom moderne policijske opreme, bez koje bi provođenje pojedinih istražnih radnji bilo nemoguće.

**Na osnovu onoga što ste rekli, čini mi se da postoji tijesna povezanost između borbe protiv organizovanog kriminala i reforme policije u Bosni i Hercegovini. Zaista, je li to tako i šta činiti dok do toga ne dođe?**

Sve je povezano jedno s drugim i nerješavanje jednog pitanja direktno utiče na drugo pitanje. Nažalost, ovdje se radi o elementarnoj sigurnosti građana koja je ugrožena ne samo zbog zamaha organizovanog kriminala, složene ekonomske i socijalne situacije, već i zbog neuređenosti države. Naša država, da bi garantovala minimum sigurnosti našim građanima, mora imati jasnu jedinstvenu policijsku strukturu u kojoj će se jasno podijeliti uloge i zadaci i u kojoj će se moći locirati jedinstvena strategija, ali i odgovornost za stanje sigurnosti. Sada kada bismo postavili pitanje ko je odgovoran za stanje sigurnosti, ne bismo mogli naći odgovor. To treba mijenjati i to ne samo zbog toga što želimo ulazak u Evropsku uniju već zbog nas samih, zbog naše sigurnosti.

Evo, nedavni slučaj hladnokrvnog ubistva Amara Mistrića i druga bezobzirna ubistva su uzrokovala negodovanje i protest građana. U to vrijeme se većinom moglo čuti kako je sve u odgovornosti neke druge institucije. Ja sam zahtijevao da niko ne bježi od odgovornosti, već da svako pogleda u svoje insitucije i učini ono što je moguće kako bi se stanje popravilo. Svakako da treba osigurati zatvorske kapacitete za smještaj osuđenih lica kako bi se smanjio broj povratnika u

vršenju krivičnih djela, svakako da kaznena politika treba biti adekvatnija i da se zakoni kakvi jesu energičnije i efikasnije provode. Ali, evo, mi smo, iako nije u našoj nadležnosti, pokrenuli pitanje jedinstvene zakonske regulative koja bi tretirala oblast nabavke, nošenja i držanja oružja, te jedinstvenih kazni za nelegalno nošenje i upotrebu oružja. Osnovani smo radnu grupu koja će uskoro izraditi prijedlog zakona koji će se donijeti ili na nivou Federacije



**Policajac je najbolji građanin jer je na sebe uzeo teret brige za našu sigurnost, koja je, opet, postala najvažniji sastojak kvaliteta našeg života. Zato svima nama policajac mora biti u središtu pažnje. Kao što se on brine za našu sigurnost - isto tako se svi mi moramo brinuti o njegovom dostojanstvu, materijalnom položaju i opremljenosti.**

BiH ili će se ova materija jedinstveno regulisati na nivou kantona. Tek tada ćemo imati jasniju, ali što je najvažnije, jedinstvenu zakonsku regulativu pa se neće moći desiti šarolikost i mogućnost da je neko kriminalac po zakonu u jednom kantonu, a u drugom nije. Naravno da bi bilo najbolje da se ova oblast reguliše na državnom nivou, ali pošto ne postoji politička volja, mi ćemo učiniti ono što je moguće u Federaciji BiH.

**Čini mi se da je pored navedenog, jedan od najvažnijih segmenata sigurnosti građana i pitanje**

**sigurnosti u saobraćaju. Poznato je da Vi već duže vrijeme radite na tom polju. Kakvi su dosadašnji rezultati i šta planirate u narednom periodu?**

Svakako, pitanje sigurnosti u saobraćaju je vrlo važno za ukupnu sigurnost građana koju želimo ostvariti. Zašto? Kada bismo posmatrali bilo koji period vremena i istražili broj nasilnih smrti i nesretnih slučajeva, vidjeli bismo da je saobraćaj postao tzv „ubica savremenog doba“. U saobraćaju stradaju poštenu građani, tu se lome ljudske sudbine. Mi smo morali pokazati odgovornost prema toj činjenici i zato smo kao i sve ostale projekte, zajedno sa kantonalnim ministarstvima unutrašnjih poslova, donijeli odluku da se strateški obračunamo s ovom pojavom.

Zajedno sa kantonalnim ministarstvima unutrašnjih poslova smo sačinili prvi bh. strateški dokument pod nazivom „Polazne osnove strategije sigurnosti drumskog saobraćaja 2008.-2013.“. Nakon prve godine primjene ovog dokumenta imamo ohrabrujuće rezultate. Ne samo da smo zaustavili tendenciju rasta saobraćajnih nezgoda, smrtno stradalih i teško povrijeđenih već smo taj broj uspjeli u značajnoj mjeri smanjiti.

**Jasno je da sve ono što je postignuto i što se želi postići u najvećoj mjeri zavisi od ljudi koji provode te planove. Svakako ovdje mislim na policajce, koji su najdirektnije izloženi ovim sigurnosnim izazovima. Vaš komentar?**

Slažem se. Policajac je najbolji građanin jer je na sebe uzeo teret brige za našu sigurnost, koja je, opet, postala najvažniji sastojak kvaliteta našeg života. Zato svima nama policajac mora biti u središtu pažnje. Kao što se on brine za našu sigurnost - isto tako se svi mi moramo brinuti o njegovom dostojanstvu, materijalnom položaju i opremljenosti. Ovaj magazin je zapravo naša težnja da policajcima osnažimo dostojanstvo koje, kako nam se čini, u ovom poratnom periodu nije na baš visokom nivou. Policajac je najbolji građanin i zato mu moramo odati priznanje. Kroz naše zajedničke projekte mi ćemo nastojati to i pokazati.

Policajci Nedim Aličković i Almir Dautović iz Sarajeva

## ZA GRAĐANE I U VATRENU STIHJU



Nedim Aličković i Almir Dautović  
Foto: Pres-služba Općine Stari Grad

Sarajevo. Hrabri policajci su odmah po saznanju stigli na lice mjesta i saznajući da se u kući nalaze dvoje starih ljudi, krenuli u akciju spašavanja. Oni su, ne obraćajući pažnju na požar koji se širio, i u tom momentu ne misleći na svoju sigurnost, ušli u zapaljenu kuću i iz nje iznijeli dvoje ljudi, 85-godišnju Almasu Hadžišabanović i 82-godišnjeg Ahmeda Bajraktarevića.

Načelnik Općine Stari Grad u Sarajevu Ibrahim Hadžibajrić je policajcima uručio zahvalnice i novčane nagrade od po 300 KM, izazivši zahvalnost za profesionalno obavljen posao, te da je povjerenje građana u rad policije na najvišem nivou. Policajci Aličković i Dautović su izjavili da bi uvijek i u svakoj situaciji isto postupili, istaknuvši da su ponosni što su spasili dvoje nemoćnih ljudi iz veoma teške situacije.

Ovo je samo jedan od primjera kako policajci hrabro i požrtvovano obavljaju svoj posao i ujedno dokazuju da posao policajca nije nimalo lagan, nego veoma zahtjevan i iziskuje mnogo truda i odricanja.

**Sanja HUBLIĆ**

P olovinom januara 2009. godine, Nedim Aličković i Almir Dautović, policajci Policijske stanice Stari Grad Sarajevo Prve policijske uprave MUP-a Kantona Sarajevo, zahvaljujući brzini i sposobnosti, spasili su dva ljudska života prilikom požara u kući porodice Hadžišabanović, ulica Očaktanum, općina Stari Grad

Policajac Edin Zulić iz Sanskog Mosta

## KAKAV JE TO DANAŠNJI "VOZAČ"?



Zulić: Razočarenje i bijes

O dlazak na godišnji odmor u julu 2009. godine je nešto što policajac Edin Zulić neće nikad zaboraviti. Na putu prema Mostaru, u blizini Jablanice, oko dva sata iza ponoći, Edin i njegovi saputnici

su naišli na mjesto saobraćajne nesreće. Putnički automobil je udario u ogradu pri čemu se zapalio. Vozač automobila Nedim Smajkić je bio u šoku jer je njegov saputnik ispao iz automobila prilikom udara u ogradu te se nalazio ispod vozila koje je gorjelo.

Edin nije izgubio prisebnost, već je pozvao 122, policijski broj za pomoć. Svoje kolege iz Mostara i Jablanice je obavijestio o nesreći i od njih zatražio pomoć. U međuvremenu, zajedno sa svojim rođakom Vehidom Rekićem i vozačem zapaljenog vozila Nedimom Smajkićem, pokušao je podići

vozilo ispod kojeg je bio povrijeđeni Anel Avdić.

Automobil nisu uspjeli podići, a zbog curenja ulja i goriva iz motora plamen se proširio na unutrašnjost vozila i njih trojica nisu mogla više prići povrijeđenom.

Nažalost, njih trojica nisu mogli spasiti Avdića, koji je na mjestu nesreće podlegao od zadobijenih povreda.

„Smajkićev vapaj za pomoć i njegovu bol neću nikad zaboraviti. Kao što nikad neću zaboraviti kako sam bio razočaran i ljut na druge vozače koji su prolazili pored nas u oba smjera. Čak se i kolona formirala, a samo nam je jedan čovjek prišao pomoći i to kad smo od njega zatražili aparat za gašenje požara“, ispričao je Edin.

Na kraju Edin dodaje da i danas, kada se sjeti ovog događaja, miješaju mu se osjećaji razočarenja i bijesa.

„Prvo na što pomislim je: Da li smo mogli spasiti jedan život? Zašto nam niko nije prišao? Kakav je to današnji 'čovjek' kada nije spreman pomoći drugom u nevolji, a pogotovo kada je u pitanju ono najvrednije - ljudski život“, kazao je Edin Zulić.

**Ale ŠILJEDIĆ**

Partnerstvo između policije i lokalne zajednice

Piše: Ivica VRDOLJAK

Foto: Ivan Mihaljević

## Dani otvorenih vrata



Učenici O.Š. "Ivan Goran Kovačić"

Tijekom mjeseca studenog Ministarstvo unutarnjih poslova Kanton 10 (K 10) održao je Dane otvorenih vrata policije.

Riječ je o manifestaciji koju organiziramo već petu godinu zaredom, a koja ima za cilj promoviranje partnerstva između policije i lokalne zajednice, odnosno koja ima za cilj smanjenje psihološke distance između policije i građana, te izgradnju povjerenja koje je pretpostavka uspješnog rada policije u zajednici.

Sve policijske uprave na području naše županije su bile otvorene za posjet građanima koji su željeli upoznati način rada policije, vidjeti uvjete u kojima radimo, opremu kojom raspolažemo, te su im vrata rukovodećih policijskih službenika bila otvorena za razgovor i rješavanje njihovih problema.

Također, u suradnji s osnovnim školama organizirali smo posjet učenika osnovnih škola policijskim upravama, a donje fotografije prikazuju učenike nižih razreda Osnovne škole „Ivan Goran Kovačić“ u posjetu PU Livno.

Zgrada Policijske uprave gotovo dva sata odzvanjalo je od veselog dječjeg glasa i smijeha. Naime, u posjet Upravi došlo je, po manjim grupama, 60-ak učenika sa svojim učiteljima.

Na samom početku djeci je pokazan način zapri-

manja i izdavanja putovnica, vozačkih dozvola i osobnih iskaznica. U posebnim prostorijama mogli su vidjeti oružje i sve one predmete koji su opasni ukoliko netko dođe u njihov posjed, a posebno zanimljivo je bilo u kriminalističkoj tehnici. Svi su za uspomenu dobili otisak prsta, te su sa zanimanjem slušali na koji način se uzimaju otisci i kako se izrađuje signaletička fotografija, kako ih sama djeca nazivaju, „lopova“ i „onih zločestih“.

Zanimljivo je bilo i u Operativno-komunikacijskom centru gdje su policajci bili ugodno iznenađeni da svi znaju broj policije 122 i kada ga treba zvati.

I mi smo uspjeli iznenaditi djecu kada smo im pokazali policijska vozila i motocikle koje koristi policija u svojem

radu.

Ukratko, bio je to jedan zanimljiv susret gdje smo bili iznenađeni otvorenosću djece, a vjerujemo da su i oni bili iznenađeni našom otvorenosću, što je bio i cilj posjeta, približiti djecu policiji, odori i policijskom teškom poslu.

Najdraži i najveseliji gosti otišli su u svoje razrede puni dojmova, svoje impresije su prikazali u svojim radovima, a obećano nam je da će netko u budućnosti postati i naš kolega.

Otisak prsta za uspomenu



## Organizirani kriminal

## Autokriminal kao oblik organiziranog kriminala u Bosni i Hercegovini

Piše: Mr. sci. Edin VRANJ

Foto: Edina Delalić



Vranj: Vještačke granice

Krađe motornih vozila su u postdejtonskoj Bosni i Hercegovini postale veoma prisutan oblik kriminala u koji su nerijetko uključene (manje ili više) organizirane kriminalne grupe koje krađu desetine i stotine auta i čiji članovi postaju sve više specijalizirani u dijelu kriminalnog posla kojim se bave. Statistički pokazatelji ukazuju da ovaj vid kriminala nema trend smanjenja, posebno u glavnom gradu Sarajevu, ali zato sve češće ima obilježja organiziranog kriminala na koji policija, tužilaštvo i sud u BiH još uvijek nemaju adekvatan odgovor. Stoga je autor, nakon prikaza stanja i specifičnosti autokriminala u BiH, iznio nemali broj prijedloga i preporuka za poboljšanje u ovoj oblasti.

Sveukupna dešavanja u Bosni i Hercegovini, kao državi sa brojnim unutrašnjim poteškoćama političke, ekonomske i socijalne naravi, uticala su i na sigurnosnu situaciju na način da je naša država posljednjih godina postala pogodno tlo za progrediranje organiziranog i drugih oblika kriminala. Sporocšću u uspostavi pravnog sistema na nivou države i entiteta te u izgradnji i razvoju sigurnosnih institucija na nivou države stvoren je manevarski prostor za razne manje ili veće kriminalne grupe.

## Osvrt na specifičnosti

Tako su npr. krađe motornih vozila od 1996. godine veoma prisutan oblik kriminala u Bosni i Hercegovini. Nerijetko se radi, u pravom smislu te riječi, o organiziranom kriminalu, odnosno organiziranim grupama od tri i više kriminalaca koji krađu desetine i stotine auta. Neki od njih u vršenju tih krivičnih djela ispoljavaju visok nivo profesionalnosti, organiziranosti, rafiniranosti i brutalnosti pa takva djela poprimaju obilježja organiziranog, odnosno međukantonalnog, međuentitetskog ili međudržavnog kriminala. Podjela posla može podrazumijevati, osim organizatora koji planira i kontrolira sve aktivnosti i koji je možda zadužen za određeno područje, osobe koje lociraju i tipuju vozila koja će biti predmetom krađe (tzv. tiperi), osobe koje će samo staviti u pogon motorno vozilo (u posljednje vrijeme se kod nekih skupocjenih vozila ove osobe-specijalisti dovode čak i iz susjednih država), osobe koje će izvršiti prijevoz vozila do određene destinacije, osobe koje su zadužene za sakrivanje otuđenog vozila, za ugovaranje i realizaciju otkupa, odnosno krijumčarenja vozila van države ili njegove prodaje autootpadima u cjelosti ili u autodijelovima, za falsificiranje dokumentacije od otuđenih

vozila, za krivotvorenje broja šasija na otuđenim vozilima, za promjene izgleda vozila, za registriranje otuđenih vozila pod novim identitetom itd.

Na udaru kradljivaca su posebno putnička motorna vozila njemačke proizvodnje marke „VW - Golf i Pasat“, „Mercedes“, „Audi“, „BMW“, a u posljednje vrijeme i „Škoda oktavija“ i drugo. Područje Kantona Sarajevo je, u tom kontekstu, najneutralniji prostor u BiH, jer je na tom prostoru oko 50 % svih počinjenih krađa vozila. Samo u novembru 2009. godine na području Sarajeva prijavljeno je 96 krađa motornih vozila. To govori da autokriminal u našoj državi i dalje ostaje aktuelan problem. Kuriozitet je svakako činjenica da se na području Kantona Sarajevo, otprilike, u jednom danu otuđi vozila koliko na području Istočnog Sarajeva (RS) za tri mjeseca.

Više je razloga za ovakav obim autokriminala. Jedan je svakako i postojanje vještačkih granica u BiH, posebno oko Sarajeva, odnosno postojanje rascjepkanosti policijskog i tužilačkog aparata na našim područjima i određenoj sporosti u toj policijsko-tužilačkoj saradnji koju kriminalci itekako koriste.

Godinama smo suočeni sa pojavom da se vozila otuđuju u Sarajevu, a da završavaju u Republici Srpskoj, gdje kriminalci otkup zakazuju najčešće na području Istočnog Sarajeva. U posljednje vrijeme je očigledna pojava da kriminalci sa područja jednog kantona otuđuju automobile u drugom kantonu, a otkup realiziraju u trećem kantonu. Nimalo slučajno! Imamo pojavu da se posljednjih godina otuđuju hiljade automobila po zvaničnoj registriranoj statistici. Na to se mora dodati i jedan broj krađa auta koje oštećeni ne prijavljuju i tako ostaju u tamnoj brojci kriminaliteta te vrste. Koji put građani u svojoj režiji, koja, nažalost, nekad bude i veoma nepovoljna po njih, pokušavaju, i ponekad

uspjevaju, vratiti svoje vozilo sistemom tzv. otkupa vlastitog vozila. Praksa pokazuje da su neki od oštećenih građana zbog nesaradnje sa policijom ostali ne samo bez auta već i bez novca datog za otkup i tako postali dvostruki gubitnici.

Ono što posebno treba da nas zabrinjava jeste činjenica da se građani na suradnju sa kriminalnim podzemljem odlučuju nerijetko nakon što utvrde da im policija svojom aktivnošću najvjerovatnije neće uspjeti pronaći njihovo vozilo. Uvidom u statistiku ove vrste kriminaliteta, evidentno je da i pored dosta uloženog truda policijskih službenika, u Kantonu Sarajevo npr., procent otkrivenosti ovih krivičnih djela, odnosno pronalaska otuđenih motornih vozila je uvijek manji od 50 %, dok je otkrivenost od policije još manja, jer jedan broj otuđenih vozila građani zaista pronalaze i otkupljuju uz pomoć kriminalaca.

Nažalost, oštećene građane na suradnju sa kriminalnim podzemljem ne podstiču samo kradljivci njihovih auta, koji sa njima kontaktiraju u vezi s otkupom sa „prepaid“ telefonskih kartica za jednokratnu upotrebu, već oštećene na otkup ponekad upućuju i pojedini policijski službenici licitirajući

Korištenje ručno napravljenih mikroprocesora, odnosno dekodera, tzv. kocki kojima se stavljaju u pogon skupocjena vozila koja imaju elektronsku zaštitu, korištenje radioveze kojom se vrlo dobro prati radiokomunikacija policijskih patrula na određenom području, korištenje vozila tzv. čistača na putu, korištenje prepaid telefonskih kartica za jednokratnu upotrebu, upotreba oružja-pištolja radi oduzimanja vozila, upotreba plina radi uspavlivanja ukućana za vrijeme dok se otuđuju originalni ključevi auta iz unutrašnjosti kuće i drugi slični metodi rada kriminalaca, nažalost, nisu više rijetkost i nepoznanica.

neprofesionalnost u policijskim redovima, podsjetit ćemo da su pripadnici Odjeljenja za borbu protiv organiziranog kriminala Sektora kriminalističke policije Federalne uprave policije na području Srednjobosanskog kantona lišili slobode i uz izvještaj o počinjenom krivičnom djelu predali dvojicu policijskih službenika.

Prvi je osumnjičen da je kao član kriminalne grupe uobičavao da nakon završetka radnog vremena skine policijsku uniformu i odloži pištolj, obuče radni kombinezon i brusilicom siječe veliki broj prethodno otuđenih vozila sa šireg područja BiH. Od gazde, vođe kriminalne grupe u čijoj kući su se skrivala i sjekla otuđena vozila, dobijao je dosta otuđenih autodijelova za sebe, a zauzvrat je vjerovatno gazdi ustupao povjerljive policijske informacije, odnosno službene tajne do kojih je mogao doći.

Drugi kolega – također policajac, po saznanjima koja se još provjeravaju, nudio je oštećenom da mu posreduje i «pomogne» u otkupu vlastitog prethodno otuđenog vozila.

O učešću u otkupu ukradenih vozila i drugim neprofesionalnostima policijskih službenika iz drugih policijskih organa, a u vezi s autokriminalom, Federalna uprava policija ima određeni kvantum operativnih saznanja, od kojih je jedan broj proslijeđen nadležnim tužilaštvima.

Činjenica koja također zabrinjava je da se mnoga vozila

otuđuju na jednom području da bi poslužila činjenju drugih, najčešće teških krivičnih djela, npr. ubistava, razbojničkih napada i sl. na drugom području. Podsjećanja radi, u nemalom broju ubistava počinjenih na području Istočnog Sarajeva izvršio su se koristili otuđenim motornim vozilima, kao što je to bio slučaj i u jednom broju razbojničkih napada na pošte ili vozila koja su vršila prijevoz novca u FBiH. S druge strane, krađe motornih vozila su nerijetko povezane sa naknadno izvršenim krivičnim djelima kao što su Iznuda i Krivotvorenje isprave. Koji put, otuđena vozila se koriste u raznim vidovima krijumčarenja (droga i sl.).

## Zaključak i prijedlozi

Šta se može zaključiti na osnovu ovog grubog prikaza stanja autokriminala? Naime, opće je prihvaćeno stajalište da organizirani kriminal, kao sigurnosni problem, predstavlja jednu od velikih prijetnji za ekonomsku, političku i socijalnu stabilnost BiH. Autokriminal kao oblik organiziranog kriminala je bez obzira na sav uloženi policijski trud i neke pozitivne rezultate i dalje vrlo aktuelan problem na području BiH. Vlasnici motornih vozila u našoj zemlji dovedeni su u poziciju da kao građani rijetko koje države u svijetu moraju razmišljati o ugradnji alarma i drugim načinom zaštite za svoje vozilo. Bez želje da kritizira, autor smatra da rezultati policijsko-tužilačko-sudskog odgovora na ovu problematiku u BiH mogu i moraju biti bolji.

Na osnovu dosadašnjih iskustava, a posebno loše prakse, autor je slobodan iznijeti sljedeće prijedloge i preporuke radi poboljšanja stanja:

1. Pod hitno insistirati na formiranju tužilaštva (ili odjeljenja u tužilaštvu) koje će pratiti aktivnosti Federalne uprave policije i drugih policijskih organa na polju borbe protiv organiziranog, odnosno međukantonalnog kriminala, iz razloga što su dosadašnja iskustva kada su se jedinstvene istrage koje se protežu na području više kantona povjeravale jednom kantonalnom tužiocu, kojeg odredi Federalno tužilaštvo, koje nema nadležnosti u prvom stepenu, uglavnom pokazivale kao sterilne.
2. Zalagati se za kontinuiranu edukaciju i linijsku specijalizaciju pojedinih tužilaca i inspektora iz ove oblasti koji će

Kada se na području bivše SFRJ posmatra geografska distribucija autokriminala, vidjet ćemo da su glavni gradovi bivših jugoslavenskih država najugroženiji ovom problematikom. Tako npr. i u Makedoniji više od polovine krađa vozila dešava se u glavnom gradu Skoplju.

Zanimljivo je da je većina policijskih menadžera, policijskih portparola i tužilaca u BiH sklonija govoriti o dobroj i sve boljoj suradnji između policijskih organa kako u FBiH tako i o suradnji policijskih i tužilačkih organa iz oba entiteta i Brčko Distrikta.

proizvođača vozila, načinima i mogućnostima hitnih provjera preko Interpola i u nacionalnim bazama podataka itd. Policajci koji rade na terenu trebaju znati na šta sve treba **Nastavak na strani 22.**

Uspostava boljih mehanizama suradnje između policije i tužitelja

## OBAVJEŠTAVANJE TUŽITELJA O POČINJENOM KAZNENOM DJELU I PODNOŠENJE IZVJEŠĆA O KAZNENOM DJELU U POLICIJSKIM SNAGAMA

Piše: **Marijan ŠIMIĆ**

Foto: **Arhiv MUP USK-a**



**Šimić: Zajednička misija policije i tužitelja**

policije i tužitelja“.

Modul je izrađen pod pokroviteljstvom Visokog sudbenog i tužiteljskog vijeća BiH, Ministarstva vanjskih poslova BiH, Vlade Ujedinjenog Kraljevstva, te EUPM-a, a započela je odabirom radnog tima u siječnju 2009. godine u Travniku.

Implementacija ovog modula bitno će izmijeniti kvalitetu i značajno unaprijediti razinu suradnje između policije i tužiteljstva, upravo iz razloga što daje odgovore na niz značajnih pitanja i otklanja dvojbe koje su se do sada pojavljivale u bilo kojem obliku, od ocjena i problema u suradnji policije i tužitelja, prava, obveze i uloge ovlaštene službene osobe u istrazi, postupku po objavi obavijesti tužitelja od ovlaštene službene osobe o osnovama sumnje da je počinjeno kazneno djelo, postupka po prijavi podnesenoj tužitelju od strane pravnih i fizičkih osoba, obavještavanja tužitelja o osnovama sumnje da je počinjeno kazneno djelo nepoznatog počinitelja, harmonizacije međusobnih evidencija, obrazaca s komentarima do preporuke i sl.

Zalažući se za nove mehanizme u suradnji,

**T**ijekom ove godine, izražena je radna angažiranost tima sastavljenog od visoko profiliranih tužitelja i policijskih dužnosnika, koji je sastavio modul na temu: „Obavještavanje tužitelja o počinjenom kaznenom djelu i podnošenju izvješća o kaznenom djelu“ u okviru projekta: „Uspostava boljih mehanizama suradnje između

modul polazi od cjelovitog tumačenja postojećih zakona o kaznenom postupku i drugih zakona te činjenica da su policijske agencije i tužiteljstva statusno različiti - imaju različita rješenja za pitanje nezavisnosti, odgovornosti, zapovjednog lanca, edukaciju, razvoj inovacija, specijalizaciju, profesionalnu podršku i sl. Pri tome su sagledane središnje teme sabrane u tri najznačajnija područja u kojima se odnos suradnje posebice očituje, a to su:

1. obavještavanje tužitelja o počinjenom kaznenom djelu, 2. istražne radnje i podjela uloga između policije i tužitelja, te 3. zajednička misija policije i tužitelja u borbi protiv kriminala.

Ove tri grupe problema podijeljene su na konkretne primjere situacija koje ilustriraju sastavne dijelove svake od njih.

Uz ostale odgovore, kod obavještavanja tužitelja o počinjenom kaznenom djelu sagledava se problem neizvršenja određenih policijskih radnji radi utvrđivanja osnovna sumnje (prije obavještavanja tužitelja o počinjenom kaznenom djelu), problem bukvalnog tumačenja termina ODMAH (čl. 218. stavak 1. ZKP-a BiH) i (odgovarajućih odredaba FBiH, RS, Distrikta), a za radnje obavještavanje tužitelja uspostavljaju se odgovarajući kriteriji i standardi.

Kod istražnih radnji i problema u podjeli uloga između tužitelja i policije u kaznenim istragama u praksi se identificiraju problemi različitog tumačenja uloga tužitelja u istragama, u lakšim i težim kaznenim djelima, prijedlozima za uspostavu istražnih centara za rješavanje lakših kaznenih djela, obavljanju istražnih radnji prije sastavljanja izvješća (npr. ispitivanje osumnjičenog ili svjedoka), različitog pristupa pisanju izvješća, zapisnika i druge korespondencije između policije i tužitelja (otuda potreba za ujednačenim obrascima), problemi kod zakonitosti dokaza prikupljenih u istražnim radnjama, propuštanje policije da osigura nadzor tužitelja nad istragom (događa se da se dokazi na sudu proglašavaju nezakonitim), uloga na očevidu, kod osiguranja osoba za prepoznavanje, pitanja kvalitete naredaba za provođenje određenih istražnih radnji koje osigurava tužitelj, pristupa tužitelja kaznenim i prekršajnim evidencijama (ne postoji jedinstvena i lako dostupna

evidencija o osuđivanosti, kaznenom progonu, potvrđenim optužnicama protiv osoba koje bi se mogle koristiti kao argument tužitelja u zahtjevima za pritvor) i sl.

Modul daje odgovarajući značaj posebnim istražnim radnjama, pri čemu, pored važnosti, ističe i probleme neobučenosti, nedovoljne tehničke opremljenosti policije, nepostojanje svih procedura (osim standardnih operativnih procedura za presretanje komunikacija) odgovarajućih uputa ukazujući na promptnost njihovog donošenja, posebno zbog specifičnosti radnji dokazivanja kod djela korupcije i uopće organiziranog kriminala.

Zalažući se za nove mehanizme za bolju suradnju tužitelja i policije, ističe se posebna važnost implementacije preporuka modula od usvajanja novih podzakonskih akata, provođenja zajedničkih edukacija između neposrednih počinitelja u zoni odgovornosti, i to kao redovna aktivnost do osiguranja uvjeta za pristup evidencijama (u sklopu proširenja telekomunikacijskih mehanizama za razmjenu informacija).

Na kraju implementacija modula razvijat će potreban osjećaj zajedničke misije policije i tužiteljstva u borbi protiv kriminala i postići zahtjevnost povezanost i utjecati na kvalitetu života u zajednici.

## Projekti

“Organizaciono, kadrovsko i materijalno-tehničko jačanje policije u borbi protiv organizovanog kriminala”

### Motiviraj, opremi i obuč



Organizovani kriminal je najveći sigurnosni problem kako u Bosni i Hercegovini tako i u svijetu. Ovo je tvrdnja najvećeg broja stručnjaka iz oblasti istraživanja kriminala dok i površne analize javnog mnijenja pokazuju iste rezultate.

Iz tih razloga, Federalno ministarstvo unutrašnjih poslova je borbu protiv organizovanog kriminala stavilo u vrh svojih prioriteta i opredijelilo se za strateški i sistematičan pristup.

U 2007. godini kreiran je dokument koji je spomenut u naslovu. Zasnovan je na tri osnovna principa: motiviraj, opremi, obuč.

Prvi korak realiziran u sklopu ovog projekta jeste da su značajno poboljšana primanja policajaca FMUP-a. U dva navrata su primanja povećana za oko 70 %.

Također u okviru ovog projekta osigurano je gotovo 700.000 KM za nabavku moderne policijske opreme potrebne za borbu protiv organizovanog kriminala.

Radi što boljeg kadrovskog ekvipiranja i modernizovanja policijskih znanja o načinima borbe protiv organizovanog kriminala u novim uvjetima i sa novim zakonskim rješenjima, na Univerzitetu u Sarajevu je u okvirima ukupne saradnje organizovan postdiplomski specijalistički studij «Zakonitost u istraživanju i dokazivanju organizovanog kriminala». Četrnaest policajaca Federalne uprave policije, te još 60-

#### O AUTORU:

Marijan Šimić, glavni inspektor, načelnik Sektora kriminalističke policije u Upravi policije Ministarstva unutaršnjih poslova USK-a Bihać.

Skoro cijeli radni vijek radio je u policijskim strukturama u Bihaću:

- operativni i rukovodni zadaci u Državnoj sigurnosti;
- tajnik Općinskog tajništva unutaršnjih poslova Bihać;
- načelnik Stanice javne sigurnosti Bihać u Centru službi sigurnosti Bihać;
- načelnik Sektora javne sigurnosti u Centru službi sigurnosti Bihać;
- koordinator u Sektoru kriminalističke policije MUP-a USK-a Bihać;
- koordinator u Uredu policijskog komesara MUP-a USK-a Bihać;
- načelnik Sektora uniformirane policije MUP-a USK-a Bihać;
- načelnik Jedinice za profesionalne standarde, unutarnju kontrolu i reviziju MUP-a USK-a Bihać;
- načelnik Sektora kriminalističke policije MUP-a USK-a Bihać.

Vodio je raznovrsne operativne timove i policijska tijela u okviru čega je imao značajne radne zadatke.

Pored ostalog, rukovodio je timom za certifikaciju MUP-a USK-a i tada je u MUP-u USK-a prvi certificiran od strane međunarodne zajednice. Kao predsjedatelj PIBO-a (Odbor za provedbu programa i projekata) izvršavao je zadatke u vezi sa standardizacijom policijskih struktura težeći uvođenju najbolje međunarodne policijske prakse, a također je dao doprinos provedbi i donošenju usvojenih strategija u raznim područjima policijske nadležnosti.

ak policajaca svih kantonalnih ministarstava unutrašnjih poslova, SIPA-e, OSA-e, Granične policije i Policije Brčko Distrikta se približava kraju ovog iznimno važnog oblika educiranja mladih policajaca. Oni bi na osnovama usvojenog znanja trebali postaviti nove standarde i efikasniji rad policije na suzbijanju organizovanog kriminala. Uporedo s ovim, na Policijskoj akademiji dodatno je organizovan niz specijalističkih kurseva.

Federalno ministarstvo unutrašnjih poslova planira u 2010. godini nastaviti sa provedbom projekta.

Početak 2010. godine provest će se sveobuhvatna kampanja o borbi protiv organizovanog kriminala. Plan je da se putem medijske kampanje, organizacije različitih vrsta događaja te posebno sastanaka predstavnika policije, pravosuđa, medija, nevladinih organizacija, građana, stvori jaka baza za jedinstvenu borbu protiv organizovanog kriminala.

Isto tako, nastavit će se s organizacijom raznovrsnih specijalističkih kurseva iz ove oblasti a također će se vršiti nabavka savremene policijske opreme neophodne za provođenje modernih operativnih i istražnih radnji.

Za ove aktivnosti, planirano je ulaganje oko 600.000 konvertibilnih maraka.

“Motiviraj, opremi i obuč” će i u budućnosti biti osnovni principi djelovanja Federalnog ministarstva unutrašnjih poslova.

**Admir KATICA**

„Neriješen slučaj“

## Više od 1.700 poziva gledalaca

Emisija „Neriješen slučaj“ je možda najbolji primjer kriminalističke inovacije u istraživanju kriminala. Metoda „od vrata do vrata“ kada policajci troše dane i noći nastojeći doći do informacija, sada je u velikoj mjeri zamijenjena ovom TV-emisijom. O tome, ali i o mogućnostima korištenja ove emisije u borbi protiv organizovanog kriminala, razgovarali smo s urednikom i voditeljem Amarildom Gutićem.

Razgovarala: Alma ĐOZO



Amarildo Gutić, urednik i voditelj emisije „Neriješen slučaj“

**Gospodine Gutiću, kakvi su dosadašnji rezultati TV emisije „Neriješen slučaj“? Da li je bilo slučajeva gdje je „Neriješen slučaj“ pomogao policiji u BiH da budu razriješeni neki predmeti iz oblasti organiziranog kriminala i ako možete da nevedete neki primjer?**

Od oktobra 2005. do decembra 2009. godine emitirane su 44 emisije serijala „Neriješen slučaj“. Predstavljen je 191 neriješen slučaj kriminalnih djela, objavljeno 167 potjernica za počinocima kriminalnih djela te traganja za nestalim osobama. Prosječno po emisiji bilo je 40 poziva gledalaca. Svi pozivi nisu sadržavali informacije o krivičnim djelima predstavljenim u emisiji, ali jesu o mnogim drugim krivičnim djelima i izvršiocima. Najviše poziva vezanih za organizirani kriminal je bilo o krivičnim djelima nedozvoljene trgovine narkoticima, gotovo polovina. Jedan broj poziva odnosio se i na organiziranje nelegalnog prelaska granice. Nemam uvida u operativne podatke, odnosno sadržaj anonimnih prijava. Možda bi povratne informacije o rezultatima poziva iz nadležnih policijskih agencija bile dobar pokazatelj i ohrabrenje građanima da nastave tako. U svakom slučaju, rezultata ima, iako, naravno, ne treba nikada biti zadovoljan u istragama organiziranog kriminala, jer se uništen u jednom, iznova javlja u drugom obliku. No, treba biti upozoran, pa će i njega biti manje.

**Možete li izdvojiti neki od slučajeva koji je razriješen na osnovu saznanja dobivenih u vašoj emisiji?**

Positivne rezultate, ako je riječ o organiziranom kriminalu, imala je priča o lažnim identitetima na CIPS ličnim kartama. Putem poziva tokom emisije izvršena je identifikacija više osoba na osnovu objavljenih fotografija, a nedugo nakon emitiranja priče i Tužilaštvo BiH je pokrenulo intezivnu istragu o izdavanju CIPS dokumenata sa lažnim identitetima, koje je rezultiralo hapšenjem više osoba. Inače, do sada je putem poziva tokom emisije riješeno više neriješenih slučajeva teškog krivičnog djela. Otkrivene su ubice Marijana Šokčevića (Brčko), Bogdana Đurića (Zenica), Milutina Mikerevića (Doboj) dok je u Kozarskoj Dubici zbog dvostrukog ubistva uhapšen Goran Kotoran. Bilo je i nekoliko hapšenja po osnovu dojave o kretanju osoba za kojima je raspisana potjernica.

**Postoji li prostor za unapređenje ovog vašeg istraživačkog alata, odnosno postoji li mogućnost za izgradnju većeg povjerenja i saradnju građana?**

Građani više razmišljaju o kriminalu u segmentu pljački stanova, krađe automobila i uličnog razbojništva, jer sa tim imaju više neposrednog iskustva. Organizirani kriminal ima specifičnosti za čije istraživanje i dokazivanje trebaju iskustveni i hrabri istražitelji. Ipak, građani neupitno imaju volju da pomognu koliko mogu. Ono što im stvara dozu rezerve jeste pitanje koliko mogu biti zaštićeni kao davaoci informacije. Mnogo je u nekom prethodnom vremenu bilo loših iskustava, i sada treba vremena da povjerenje postane obostrano. Primjera radi, nedavno je u našu redakciju zvala žena iz HNK-a da pita koliko je zaštićen identitet pozivaoca. Sa njenog telefona komšinica je zvala liniju Krimolovci da prijavi neku kriminalnu radnju i ona je bila uplašena da neko ne sazna broj i nju označi kao davaoca informacije. Potrebna je stalna kampanja i edukacija građana i o njihovim mogućnostima da pomognu policiji. Na to stalno ukazuje i emisija „Neriješen slučaj“.

Odnosi s javnošću u radu agencija za provođenje zakona u BiH

## Pozicioniranje struke i jačanje profesionalizacije

Piše: Srećko BOŠNJAK

Foto: Arhiv MUP HNK



**Bošnjak: Ogromni pomaci u odnosima s javnošću**

Odnosi s javnošću i prva priopćenja prvotno su krenula početkom 20. stoljeća od strane željezničkih kompanija u SAD-u koje su ovim načinom komunikacije s javnošću htjele izbjeći direktno sučeljavanje sa novinarima i javnošću zbog pitanja koja su bila neugodna na koje kompanije nisu imale prave odgovore.

U početku je ovaj oblik komunikacije smatran izvjesnom vrstom samoreklame, no tijekom vremena njihov se oblik promijenio, te su priopćenja postala pouzdan i besplatan izvor informacija za medije koji su ih mogli iskoristiti za plasiranje vlastitih priča. Danas se izvješća za javnost najčešće ne objavljuju u svom izvornom i integralnom obliku, već mediji pribjegavaju određenim intervencijama i prilagodbama s ciljem pojačavanja interesa za informaciju radi povećanja tiraža ili gledanosti, te povećanja uvjerljivosti ili kredibilitnosti informacije, njene autorizacije ili potvrđivanja informacije iz više nezavisnih izvora.

U vrijeme ubrzanog tehnološkog napretka i procvata alata i pomagala koja ubrzavaju i olakšavaju komunikaciju, prvenstveno internet komunikacije i e-maila kao sredstva prijenosa poruke, elektronička pošta preuzima primat i postaje osnovni alat i glavni način distribucije izvješća za javnost. Elektronička forma medijske i interne komunikacije i prezentacije događaja pogodna je i za tehničku doradu, korekciju i proširenje i ona postaje prevladavajući način komunikacije kako prema internoj tako i eksternoj javnosti.

Unutar agencija za provođenje zakona odnosi s javnošću su nova i mlada struka koja dobija na značenju iz dana u dan.

Pozicioniranje struke i jačanje profesionalizacije u oblas-

ti odnosa s javnošću unutar agencija za provođenje zakona kako na državnoj tako i na entitetskoj i županijskoj razini započelo je otprilike prije pet godina zahvaljujući inicijativi nekolicine entuzijasta, uposlenika agencija za provođenje zakona na poslovima glasnogovornika. Navedena grupa, kojoj sam imao čast pripadati i predsjedati, osnovala je Forum glasnogovornika agencija za provedbu zakona čiji su članovi bili a i danas su glasnogovornici: SIPA-e, Granične policije, Federalne uprave policije, Policije RS-a, te županijskih MUP-ova i Policije Brčko Distrikta. Navedena grupa ljudi uz nesebičnu finansijsku i tehničku kao i stručnu pomoć PPID-a misije EUPM-a do sada je osmislila i idejno pokrenula te dala naznake kreativnog koncepta šest kampanja na razini Bosne i Hercegovine a tim kampanjama svi smo svjedočili i policija je na njima izgradila svoju vjerodostojnost, te nametnula svoj vizuelni i korporativni imidž u mjeri i na način koliko su to novčane i druge prilike dopuštale.



Tijekom ovih nekoliko godina uposlenici su postigli ogromne pomake u oblasti odnosa s javnošću, te su prošli u organizaciji EUPM-a i Centra za strateške komunikacije iz Londona i određenu stručnu edukaciju, te su mnogi prošli i proces profesionalne certifikacije koja im može poslužiti u daljnjem razvoju karijere. Kao dokaz ovih i ovakvih ozbiljnih nastojanja da se ova profesija i struka unutar policije podigne na vrhunsku razinu je i niz priznanja koja su dobili glasnogovornici agencija za provođenje zakona a između ostalih i Zlatno pero /Gold Quill/ za glasnogovornika godine za 2008. godinu kao i uvaženi status osoba čija se riječ poštuje, sa povjerenjem citira i prihvata sa povjerenjem.

Za sve ove rezultate i nesmetan put ka razvoju i unapređenju odnosa s javnošću treba zahvaliti i direktoru Federalne uprave policije, direktoru Policije RS-a, te policijskim komesarima i ministrima, te Federalnom ministru unutarnjih poslova uz čiju podršku su i relizirani svi programi i svi projekti koji su do sada zamišljeni i provedeni.

Stoga s punim optimizmom i nadom u bolje sutra svim čitateljima lista „Stop“ želim sretnu Novu 2010. godinu.



## MENADŽMENT U POSJETI SPECIJALCIMA



U sklopu redovnog materijalno-tehničkog opremanja MUP-a TK, nabavljena su nova savremena sredstva namijenjena potrebama Jedinice policije za podršku MUP-a TK (uniforme i naoružanje).

Tim povodom, ministar MUP-a TK prof. dr. Sead Omerbegović, policijski komesar Nedim Mutapčić i načelnik Sektora uniformisane policije Zijad Srabović boravili su u radnoj posjeti Jedinici policije za podršku, čiji su pripadnici pod vodstvom komandira Jedinice Dževada Kormana upriličili smotru nove opreme, naoružanja i sredstava.

Prilikom posjete, održan je i sastanak menadžmenta MUP-a TK sa komandirima Jedinice, radi iznalaženja mogućnosti poboljšanja smještajnih kapaciteta, a sve radi poboljšanja postojećih uvjeta rada.

Izudin ŠARIĆ

## Posjeta Ekspertnog tima Evropske komisije



U sklopu priprema za dolazak Ekspertnog tima Evropske komisije za sigurnost dokumenata, koji je

boravio u višednevnoj posjeti Bosni i Hercegovini, u sjedištu MUP-a TK je 2. decembra 2009. godine održan radni sastanak ministra unutrašnjih poslova Tuzlanskog kantona prof. dr. Seada Omerbegovića i načelnika Sektora za administraciju MUP-a TK Safeta Begića sa načelnicima Odjeljenja za administraciju iz svih općina Tuzlanskog kantona.

Cilj sastanka bio je priprema lokacija za izdavanje biometrijskih pasoša kao i sigurnost identifikacionih dokumenata koje izdaje MUP TK.

Na sastanku je konstatovano da je MUP TK u dosadašnjem periodu uradio značajan posao, kao i da su poduzete sve potrebne mjere iz njegove nadležnosti kako bi se građanima BiH omogućilo ispunjavanje uvjeta za uspostavljanje bezviznog režima.

Također, analizirano je stanje u oblasti rada Odjeljenja za administraciju, sa posebnim osvrtom na stanje u oblasti primjene novog Zakona o putnim ispravama i registraciji motornih vozila.

Izudin ŠARIĆ



## Srednjobosanski kanton

### Dojave o postavljenim eksplozivnim napravama najčešće u školama

Protekle godine policijskim stanicama u Srednjobosanskom kantonu više puta je prijavljeno postavljanje eksplozivnih naprava.

Na udaru lažnih dojava posebno su bile izložene škole ali i druge ustanove, međutim, svakako izdvajamo Srednju ekonomsko-tehničku školu u Travniku. Naime, ovoj školi je u toku 2009. godine upućeno devet dojava. U aprilu su upućene čak četiri dojave i to u vrijeme kada su bile zakazane pismene provjere znanja učenika.

Na meti „lažnih“ dojava našla se i Srednja mješovita škola u Travniku, u istom periodu i u Srednjoj ekonomsko-tehničkoj školi su bile lažne dojave.

Istu dojavu pred kraj školske godine, tačnije, u maju dobila je i Srednja škola u Vitezu, a što se također ponovilo u oktobru, zatim „KŠC – Gimnazija“ u Travniku u novembru i

decembru, „Medresa“ u Travniku u aprilu protekle školske godine.

Pored obrazovnih ustanova, i Policijska stanica Travnik je bila metom dojava o postavljenjnoj eksplozivnoj napravi. Naime, 5. februara 2009. godine, prema dojavi, u prizemlju policijske stanice u toaletu postavljena je „kašikara“.

Ovaj put nije bila riječ o lažnoj dojavi, nego o pravoj bombi, koja je sigurno ukonjena.

Tokom 2009. godine obavljeno je 47 pregleda, od kojih je po dojavi bilo 29, a 18 redovnih.

Pored stvarne dojave u Policijskoj stanici Travnik, druga stvarna dojava je bila u u „Srednjoj ekonomsko-ugostiteljskoj školi“ u Travniku.

Sefir BARUČIJA



## SPREMNO DOČEKAJMO ZIMU

Uprava policije Ministarstva unutrašnjih poslova Bosansko-podrinjskog kantona Goražde u svom radu poseban akcent stavlja na preventivno djelovanje u svim segmentima rada.

U sklopu Akcionog plana iz dokumenta "Polazne osnove strategije sigurnosti drumskog saobraćaja Federacije Bosne i Hercegovine 2008.-2013.", Policijska stanica za kontrolu i regulisanje saobraćaja, u saradnji sa BIHAMK-om, organizovala je posebnu akciju preventivnog karaktera pod nazivom "Spremno dočekajmo zimu".

Policijski službenici su zajedno sa predstavnicima BIHAMK-a vršili kontrolu tehničke ispravnosti vozila i posjedovanje neophodne zimske opreme. Vozačima, kod kojih je utvrđena tehnička neispravnost na vozilima ili nedostatak zimske opreme, nisu izricane sankcije, već su predstavnici BIHAMK-a na licu mjesta otklanjali manje kvarove na vozilima, a za veće, vozačima je sugerisana opravka u odgovarajućim servisima.

Saradnja Ministarstva unutrašnjih poslova i BIHAMK-a traje duži niz godina, a ova akcija kao i sve druge koje su dosad organizovane nailaze na punu saradnju i podršku svih vozača, a kao rezultat ovakvog preventivnog rada



Policijska u saradnji sa BIHAMK-om

policije između ostalog je i podatak da na području Bosansko-podrinjskog kantona Goražde u toku 2008. i proteklih deset mjeseci 2009. godine nije bilo saobraćajnih nezgoda sa smrtno stradalim licima.

Emko RIZVANOVIĆ

## ŠKOLSKE SAOBRAĆAJNE PATROLE



### Povećanje sigurnosti djece

Radi povećanja sigurnosti djece i učenika u saobraćaju, Uprava policije Ministarstva unutrašnjih poslova Bosansko-podrinjskog kantona Goražde kontinuirano provodi projekte edukacije djece predškolskog i školskog uzrasta iz oblasti poznavanja propisa iz sigurnosti saobraćaja. Ove aktivnosti provode se tokom cijele školske godine.

Kako bi „mali policajci“ svoja stečena znanja iz teoretske obuke pokazali i praktično, Ministarstvo unutrašnjih poslova Bosansko-podrinjskog kantona Goražde u saradnji sa

menadžmentom i pedagogima svih osnovnih škola sa područja Kantona, organizovali su pilot-projekt pod nazivom "Školske saobraćajne patrole". Njihov zadatak je da omoguće nesmetan i siguran prelaz učenika, posebno onih najmlađih, preko pješačkih prelaza u blizini škola. U sastav školskih saobraćajnih patrola odabrani su oni učenici koji su pokazali najviše znanja i interesovanja iz oblasti sigurnosti saobraćaja.

Učenici "mali policajci" su, zajedno sa policijskim službenicima policijske stanice za kontrolu i regulisanje saobraćaja, vršili regulisanje saobraćaja. Tokom ovih aktivnosti

policija ne poduzima represivne mjere, a počiniocima prekršaja, vozačima i pješacima, učesnicima u saobraćaju, dijelili su promotivne materijale edukativnog karaktera iz oblasti sigurnosti saobraćaja.

Ovakve aktivnosti redovno finansijski podržavaju predstavnici EUPM-a u Bosni i Hercegovini a za ovaj pilot-projekt osigurali su policijske uniforme za pripadnike školskih saobraćajnih patrola.

Ševko GUŠO



Predstavljamo JEDINICU ZA PROFESIONALNE STANDARDE MUP-a Županije Posavske

## Istraženo 275 predmeta od 1998. godine!

Jedinicom za profesionalne standarde MUP-a ŽP od 2007. godine rukovodi načelnik jedinice samostalni inspektor Davor Vidović, diplomirani inženjer s bogatim 20-godišnjim policijskim iskustvom.

U jedinici su raspoređeni i inspektori Marko Vincetić, sa 14-godišnjim policijskim iskustvom, koji je prošao sve razine službe uprave policije i Anto Klaić, sa policijskim iskustvom od 18 godina, koji je kao mlađi kolega prošao sve razine policijske organizacije Uprave policije MUP-a.

U periodu od 1998. do 2009. godine ova jedinica je, iako dugo vremena nepopunjena, zaprimila i uspješno istražila 275 predmeta predstavki protiv uposlenika MUP-a.

Tijekom 2009. godine zaprimljena je 31 predstava od kojih je šest utemeljenih, šest neutemeljenih, dvije oslobađajuće, četiri bez dovoljno dokaza, devet obustava postupaka i četiri su još uvijek istrage u tijeku.

Tijekom ove godine izvršene su inspekcije i revizije Implementacije akata naredbodavnog karaktera izdanih od strane policijskog komesara, zloupotrebe bolovanja, kontrole provođenja instrukcije o postupanju sa predmetima istraga kaznenih djela i događaja, kontrola primopredaje dužnosti van službenih prostorija, kontrola implementacije zakona o prekršajima FBiH, revizija i inspekcija podnesenih izvješća o upotrebi sile, kontrola korištenja službenih vozila, kontrola efikasnog korištenja radnog vremena, inspekcija memorije radara i alkotestera, inspekcija izdanih oružnih listova i postupanja nakon isključenja vozila i vozača.

Jedinica u svom radu preferira rad po internim inspekcijama i revizijama na način da se dijagnosticira eventualni problem, provede revizija i inspekcija a po potrebi, nakon naloženog roka za postupanje po naloženim mjerama, provede i reinspekcija.

**Josip DOMINKOVIĆ, mag.ing prometa**



Kanton Sarajevo

USPJEŠNO OKONČANA KAMPANJA

## Zamjena oružnih listova u MUP-u Kantona Sarajevo

Nabavljanje, posjedovanje i nošenje vatrenog oružja bilo je uvijek interesantno i specifično pravo građanina. Za ostvarivanje ovog prava nužno je ispunjavanje zakonom precizno određenih općih i posebnih uvjeta i tek nakon toga podnosilac zahtjeva je mogao dobiti odobrenje za nabavljanje oružja i municije. Po izvršenoj nabavci oružja, nadležna policijska uprava za njegovo držanje i nošenje izdaje oružni list. Prilikom držanja ili nošenja oružja imalac je dužan kod sebe imati oružni list izdat za to oružje i na zahtjev policijskih službenika omogućiti uvid u to oružje i oružni list.

Da bi se ova oblast maksimalno uredila i zakonski propisala i uokvirila, Skupština Kantona Sarajevo je na sjednici održanoj 28. 11. 2009. godine donijela "Zakon o nabavljanju, držanju i nošenju oružja i municije", koji je objavljen u "Službenim novinama" Kantona Sarajevo, br. 38 od 13. 12. 2007. godine, a dan nakon objavljivanja je stupio na snagu.

Pored ostalih odredbi, ovim zakonom je u članu 57. nametnuta obaveza svim osobama koje u trenutku njenog stupanja na snagu imaju oružni list bez obzira na datum njegovog izdavanja od nadležnog organa u Bosni i Hercegovini da u roku od jedne godine od stupanja na snagu ovog zakona podnesu zahtjev za zamjenu oružnog lista

nadležnoj policijskoj upravi.

Nakon izvršene analize zamjene oružnih listova u prva tri kvartala 2008. godine, MUP Kantona Sarajevo je ocijenio da broj podnesenih zahtjeva za zamjenu nije očekivan i zadovoljavajući te se započelo s procedurom za podnošenje prijedloga za izmjenu i dopunu spomenutog zakona radi produženja roka za podnošenje zahtjeva za još jednu godinu. Nakon podnošenja prijedloga od našeg ministarstva, Skupština Kantona ga je prihvatila i Zakonom o izmjenama i dopunama Zakona o nabavljanju, držanju i nošenju oružja i municije koji je stupio na snagu 1. 1. 2009. godine, produžila rok za podnošenje zahtjeva za još godinu dana, odnosno do 14. 12. 2009. godine. Da bismo intenzivirali aktivnosti na zamjeni oružnih listova, organizovana je kampanja koja je uključila distribuciju promotivnog materijala građanima Kantona Sarajevo.

Tokom ove informativne kampanje pravnim i fizičkim licima je podijeljeno 5.387 letaka, obavještenja, a na 190 mjesta postavljeno je 190 odgovarajućih plakata.

Kao rezultat svih ovih aktivnosti, do 14. 12. 2009. godine nadležnim policijskih upravama je podneseno oko 8.000 zahtjeva za zamjenu oružnih listova, što pokazuje da je ova kampanja polučila dobre rezultate.

**Irfan NEFIĆ**

Polazne osnove strategije sigurnosti drumskog saobraćaja 2008.-2013.

## Borba protiv "ubice savremenog doba"

U prvih devet mjeseci 2009. godine na cestama FBiH spašena 33 ljudska života

Piše: Alma ĐOZO

Foto: Edina Delalić



**Okrugli sto o temi: „Alkohol kao uzročnik saobraćajnih nezgoda“**

SARAJEVO – U prvih devet mjeseci 2009. godine na cestama u FBiH 139 osoba je poginulo u saobraćajnim nezgodama, što je 19,20% manje u odnosu na isti period 2008. godine. Ovi, ali i drugi rezultati iz oblasti saobraćaja saopćeni su 22. decembra 2009. godine na pres-konferenciji Ekspertnog tima za praćenje implementacije Akcionog plana za provođenje mjera iz dokumenta „Polazne osnove strategije sigurnosti drumskog saobraćaja Federacije Bosne i Hercegovine 2008.-2013.“.

„Ovi podaci su veoma ohrabrujući, jer primjenom Akcionog plana za provođenje mjera iz dokumenta „Polazne osnove strategije sigurnosti drumskog saobraćaja Federacije Bosne i Hercegovine 2008.-2013.“, policija je spasila 33 osobe. Smrtnost je smanjena više i od zacrtanih ciljeva i s pravom kažem da su podaci ohrabrujući. Mi ćemo zajedno sa kantonalnim ministarstvima unutrašnjih poslova i u narednoj godini nastaviti s ovim aktivnostima, sve s ciljem da se spase ljudski životi“, istakao je tokom pres-konferencije Muhidin Alić, federalni ministar unutrašnjih poslova.

Admir Katica, savjetnik federalnog ministra unutrašnjih poslova i član Ekspertnog tima FMUP-a, kazao je da je pored smanjenja broja smrtno stradalih, primjenom Akcionog plana za provođenje mjera iz navedenog dokumenta smanjen i broj teško povrijeđenih.

„Za devet mjeseci 2009. godine teško je povrijeđena 921 osoba, što je 19% manje u odnosu na uporedni pe-

riod 2008. godine. Mi našu zajedničku borbu protiv "ubice savremenog doba" nastavljamo i u 2010. godini, a sve radi spašavanja ljudskih života“, pojasnio je Katica.

Pored brzine, na drugom mjestu je alkohol kao uzročnik saobraćajnih nezgoda u FBiH.

U organizaciji Ekspertnog tima za praćenje implementacije Akcionog plana za provođenje mjera iz dokumenta „Polazne osnove strategije sigurnosti drumskog saobraćaja Federacije Bosne i Hercegovine 2008.-2013.“ FMUP-a, 22. decembra 2009. godine u Domu policije je održan Okrugli sto o temi: „Alkohol kao uzročnik saobraćajnih nezgoda“.

Učesnici ovog okruglog stola bili su: prof. dr. Osman Lindov, doc. dr. Safet Kapo, prof. dr. Jasna Bajraktarević, Darko Omeragić, novinar Oslobođenja, dr. Jasminka Kovačević, Ministarstvo zdravstva FBiH, Fuad Klisura, Institut za privredni inženjering.



**Konferencija za medije Ekspertnog tima**

Uzrok 1.287 saobraćajnih nezgoda u kojima je poginulo 13 osoba u prvih devet mjeseci 2009. godine na području Federacije BiH je alkohol. U ovim nezgodama 68 osoba je teže povrijeđeno. Ovi podaci ukazuju na činjenicu da je broj saobraćajnih nezgoda u FBiH, a gdje je uzrok alkohol, u prvih devet mjeseci ove godine povećan za 7,8 %.

## Grudsko Vijeće za prevenciju kriminaliteta (VPK) potiče rješavanje problema građana u zajednici

VPK Grude osnovano je 14. 7. 2009., broji 15 članova, a predsjednik VPK Grude je Nikica Tomas, koji je ujedno i predsjednik Općinskog vijeća Grude.

VPK Grude okuplja predstavnike lokalne vlasti, policije, školstva, zdravstva, udruga građana, predstavnike poslodavaca, učenika, Crkve, Centra za socijalni rad, općinske inspekcije, a zastupljeni su i svi dijelovi općine.

Dakle, VPK Grude okuplja predstavnike svih relevantnih društvenih subjekata iz te općine koji raspravljaju o svim sigurnosnim problemima, pokreću inicijative za rješavanje problema i ujedno vrše pritisak na nadležne institucije da detektirane probleme riješe.

Među prvim problemima koje je VPK detektirao bilo je učestalo opijanje učenika SŠC "A. B. Šimić" za vrijeme nastave, izostanci učenika s nastave i razni vidovi njihovog devijantnog ponašanja. Rasprava o toj temi pokazala je da su godinama svi nadležni zatvarali oči pred tim problemom, sve institucije su odgovornost prebacivale na druge i potpuno je izostala suradnja pa i komunikacija među institucijama. Nakon otvorene rasprave odlučeno je da će

općinski inspektori i policija početi zajednički kontrolirati toče li se alkoholna pića maloljetnicima u kafićima koji se nalaze u blizini škole, obavljen je razgovor s vlasnicima tih kafića i osigurana njihova podrška te je u vrlo kratkom roku riješen problem koji se godinama činio nerješivim.

Drugi detektirani problem bio je premalo prisustvo policije u Drinovcima i posljedični osjećaj nesigurnosti prvenstveno starijih građana. Taj problem riješen je tako što je kontakt-policajac zadužen da svakodnevno dolazi u Drinovce a MZ Drinovci osigurala je prostoriju u kojoj građani mogu potražiti kontakt-policajca i iznijeti mu svoje probleme.

Iz navedenih primjera vidljivo je da VPK mogu biti iznimno učinkovita pod pretpostavkom da animiraju što veći broj društvenih subjekata koji su okupljeni oko zajedničkog cilja – stvaranja sigurnije lokalne zajednice, i koji su spremni zarad realizacije toga cilja iskreno surađivati s drugim društvenim subjektima.

**Damir ČUTURA**



Viktor Roso, predsjednik Mjesne zajednice (MZ) Drinovci:

MZ Drinovci ima približno 3.000 stanovnika i najveća je MZ u općini Grude. Drinovci su od Gruda udaljeni samo 20 km, ali zbog velikog broja starijih domaćinstava brojni građani, de facto, teško mogu doći do državnih institucija a samim time otežano ostvaruju svoja prava. Stoga smo kontaktirali čelne ljude policije i postigli dogovor da u Drinovcima svakodnevno boravi kontakt-policajac a u tu svrhu osigurali smo mu i ured u zgradi koja je u vlasništvu MZ. Nažalost, ta zgrada je oronula, skromnim sredstvima kojima raspoložemo uredili smo ured a sada tražimo donatora koji bi bio spreman financirati zamjenu otvora i sanaciju oštećenja.



Nikica Tomas, predsjednik Općinskog vijeća Grude i ujedno predsjednik Vijeća za prevenciju kriminaliteta (VPK) u općini Grude:

Rad VPK pokazao je da su brojni problemi, s kojima smo se bojali suočiti, zapravo lako rješivi, pod pretpostavkom da se uspostavi iskrena suradnja između različitih tijela vlasti. Suradnja općinske inspekcije, policije i ugostitelja u kratkom je vremenu praktično iskorijenila pojavu izbijanja učenika iz škole i opijanja za vrijeme nastave. Ti rezultati, ostvareni zahvaljujući suradnji raznih državnih tijela i društvenih subjekata, putokaz su u kome smjeru i nadalje trebamo ići.

Nastupi nogometne reprezentacije Bosne i Hercegovine

## Ponosni na iskazanu požrtvovanost i profesionalizam

Piše: Aldina AHMIĆ

Foto: Arhiv MUP Zeničko-dobojski kanton



Sa jedne utakmice na stadionu "Bilino polje"

Stadion "Bilino polje" je centar svijeta kada su u pitanju nastupi nogometne reprezentacije Bosne i Hercegovine. Svaka utakmica je predstavljala poseban izazov sa stanovišta organizacije i sigurnosti.

Uprava policije MUP-a Zeničko-dobojskog kantona dosljedno primjenjuje odredbe Zakona o bezbjednosti održavanja sportskih takmičenja u Zeničko-dobojskom kantonu prilikom poduzimanja mjera i radnji na osiguranju nogometnih utakmica i drugih sportskih događaja i takmičenja.

Naznačene aktivnosti su dale dobre rezultate a to potvrđuje i činjenica da je MUP Zeničko-dobojskog kantona u proteklom periodu osigurao značajne nogometne utakmice bh. reprezentacije, kada nisu evidentirani slučajevi narušavanja javnog reda i mira i izgredi, niti bilo kakva ugrožavanja lične i imovinske sigurnosti navijača i gostiju.

Uprava policije MUP-a Zeničko-dobojskog kantona blagovremeno je prepoznala probleme kada su u pitanju neredi i huliganstvo na utakmicama, identifikovala ih i u skladu s izvršenim procjenama pristupila sistemskom rješavanju naznačenog problema.

S obzirom da se radilo o veoma značajnim međunarodnim utakmicama, ništa nije prepušteno slučaju. Poseban Plan mjera i radnji je napravljen za svaku utakmicu posebno. Pored mjera vidljivih građanima i medijima, kao što je fizičko osiguranje, poduzimane su mjere saobraćajnog, operativnog i KDZ osiguranja utakmica.

Ističemo da je prilikom odigravanja ovih utakmica bio onemogućen ulazak na stadion osobama koje već imaju izrečenu zaštitnu mjeru zabrane prisustva sportskim takmičenjima. Ova mjera je novina u FBiH, a u skladu je

s odredbama Zakona o bezbjednosti održavanja sportskih takmičenja u Zeničko-dobojskom kantonu.

Usljed povećane frekvencije saobraćaja za vrijeme utakmica, detaljne informacije o eventualno izmijenjenim režimima saobraćaja su dostavljane građanima Zenice.

Pored pojačane komunikacije sa građanima, svojim saopćenjima Uprava policije Ministarstva unutrašnjih poslova Zeničko-dobojskog kantona je pozivala navijače da se pridržavaju zakonskih odredbi i naredbi koje su se izdavale u skladu sa planiranim aktivnostima od ovlaštenih službenika.

Povodom odigravanja međunarodne nogometne utakmice između reprezentacija BiH i Portugala, na stadionu "Bilino polje" u Zenici 18. 11. 2009. godine, a u sklopu priprema koje su se poduzimale na osiguranju ovog značajnog sportskog događaja, Ured policijskog komesara je izradio letak sa sadržajem koji je bio namijenjen navijačkoj populaciji i koji je imao za cilj da podsjeti navijače na prekršaje, protivpravne radnje i ponašanja prije, za vrijeme i nakon održavanja utakmice.

Policijski službenici su prilikom obavljanja redovnih poslova i zadataka, nekoliko dana prije održavanja utakmice započeli sa podjelom letaka i promovisanjem njihovog sadržaja.

Za poduzimanje svih aktivnosti na osiguranju ovih sportskih događaja su angažovane značajne policijske snage Uprave policije MUP-a Zeničko-dobojskog kantona, kao i određen broj službenika jedinica za podršku iz drugih kantonalnih MUP-ova i službenika Jedinice policije za zaštitu ličnosti i osiguranje objekata Federalne uprave policije.

Uprava policije MUP-a Zeničko-dobojskog kantona je na profesionalan i ozbiljan način odgovorila na postavljene zahtjeve te ove značajne sportske događaje osigurala na najbolji način i svim učesnicima i gostima pružila maksimalnu ličnu i imovinsku sigurnost.

Ponosni smo na iskazanu požrtvovanost i profesionalizam naših službenika kao i veliku predanost u radu.

Posebno naglašavamo činjenicu da je prilikom poduzimanja naznačenih aktivnosti ostvarena izuzetna saradnja sa građanima i gostima, koji su prepoznali naše napore, postupali u skladu s izdatim naredbama i uputama naših službenika te korektnim i sportskim ponašanjem i navijanjem dali senzacionalnu dimenziju ovom značajnom sportskom događaju.

## Izmjena koncepta osnovne policijske obuke

Izmjena koncepta osnovne policijske obuke dio je kontinuiranog procesa reforme obuke policije. Ova izmjena treba da odgovori novim zadacima i izazovima pred policijskim službenicima u sprečavanju i borbi protiv svih vrsta kriminala. Da bi se tom izazovu uspješnije odgovorilo, nameće se potreba uspostave novog koncepta – sa dosadašnje jednogodišnje policijske obuke na općepriznato školovanje za čin "policajac".

Piše

Mr. sci. Taib SPAHIĆ



Taib Spahić: Novi koncept obuke

Prema važećim propisima za ulazak u policiju, za početni čin "policajac", kandidati trebaju pored općih ispunjavati i posebne uvjete, i to: starosna dob od 18 do 27 godina, završena najmanje srednja škola, položen vozački ispit za "B" kategoriju, psihofizičke sposobnosti, položen test informisanosti i pismeni rad, te zdravstvena sposobnost<sup>1</sup>. Kandidati koji ispune ove uvjete na osnovu konačnog spiska policijskog organa za čije potrebe se školuju upućuju se na jednogodišnju osnovnu policijsku obuku<sup>2</sup>.

Za čin "mlađi inspektor" propisano je da kandidati pored uvjeta potrebnih za čin "policajac" mogu imati starosnu dob do 35 godina, te završenu univerzitetsku višu ili visoku školsku spremu. Kandidati nakon selekcije u policijskom organu za čije potrebe se školuju pohađaju osnovnu šestomjesečnu policijsku obuku na Policijskoj akademiji<sup>3</sup>.

### NOVI KONCEPT OBUKE ZA ČIN "POLICAJAC"

Cilj uvođenja novog koncepta policijske obuke za čin "policajac" jeste da se dugoročno osigura školovanje polaznika za potrebe policijskih organa na novi način koji će omogućiti postizanje višeg nivoa kvaliteta, uz skraćeno ukupno vrijeme školovanja, umjesto dosadašnjeg načina koji je prvenstveno bio orijentisan na kvantitativnu multietničku i popunu policijskih organa po spolnom sastavu<sup>4</sup>.

**Jača strana** - Za razliku od dosadašnje osnovne policijske obuke koja je uvedena 1998. godine, reformisani način školovanja na Policijskoj akademiji zasniva se na novom dvogodišnjem konceptu. Postojeći jednogodišnji koncept odgovarao je prvenstveno s ekonomskog i kvantitativnog aspekta<sup>5</sup>. Nedostatak postojećeg koncepta je u tome što jedna godina policijske obuke nije društveno općepriznata kao stepen stručne spremlje, nego ima interni karakter za rad u policiji, a ukupno vrijeme potrebno da kandidat poslije osnovne škole stupi na samostalno obavljanje policijskih poslova iznosi pet godina<sup>6</sup>.

Po novom dvogodišnjem konceptu školovanja kandidati bi se primarno sa završena dva razreda srednje škole u građanstvu (IV stepena stručne spremlje), što znači da bi već raspolagali određenim nivoom općeg znanja. Školovanje na Policijskoj akademiji trajalo bi još dvije godine,

nakon čega bi polaznici sticali zvanje "policajac". Ovo bi omogućilo da se uz kognitivni aspekt u toku dvogodišnjeg školovanja na Policijskoj akademiji polaznici usmjere na sticanje novih znanja, vještina i sposobnosti neophodnih za efikasno policijsko djelovanje u demokratskoj društvenoj zajednici.

Polaznici koji uspješno završe osnovnu policijsku obuku upućivali bi se na rad u policijske organe za čije potrebe su školovani, gdje bi na poslovima "policajca" u početnom činu proveli jednu do dvije godine. Nakon toga bi se usmjeravali na obuku iz uže specijalističkih policijskih oblasti u skladu s iskazanim sposobnostima i željama<sup>7</sup>.

U reformisanom sistemu obuke polaznici bi bili osposobljeni za obavljanje šireg spektra društvenih djelatnosti, a ne samo za interno zanimanje u policiji, te bi sa diplomom o završenom policijskom školovanju (IV stepen školske spremlje), koja bi vrijedila na cijelom teritoriju Bosne i Hercegovine, mogli konkurisati za obavljanje poslova kako iz oblasti sigurnosti tako i u drugim organima iz oblasti provedbe zakona i slično<sup>8</sup>.

**Slabija strana** - Nedostatak ovog koncepta je što dvogodišnje školovanje zahtijeva da još uvijek maloljetni polaznici nakon završena dva razreda srednje civilne škole nastave školovanje na Policijskoj akademiji, čime se narušava kontinuitet njihovog započetog srednjoškolskog školovanja. To može rezultirati psiho-socijalnim problemima, te poteškoćama u prilagođavanju polaznika internatskom načinu života i

drugačijem načinu školovanja od dotadašnjeg. Također, upis na Policijsku akademiju ne bi se mogao osporiti ni kandidatima sa završenim fakultetskim i srednjim obrazovanjem koji ispunjavaju opće uvjete, što bi moglo rezultirati heterogenom strukturom polaznika.

**Prilike** - Uvođenje novog dvogodišnjeg koncepta osnovne policijske obuke omogućava da se školovanje izvede uz postojanje jače korelacije teorijske i praktične nastave<sup>9</sup>. Organizovanjem efikasne praktične nastave osigurat će se veća koordinacija Policijske akademije sa policijskim organima. Također, omogućit će se lakše uvezivanje policijske obuke u buduću jedinstvenu policijsku strukturu Bosne i Hercegovine.

**Zadaci** - Uvođenje novog koncepta školovanja podrazumijeva izmjenu i dopunu postojećih zakonskih i podzakonskih propisa policijskih organa. Primjena novog koncepta mogla bi otpočeti od septembra 2011. godine, do kada bi se izvršila registracija Policijske akademije u registar srednjih škola pri Ministarstvu za obrazovanje, kao i izvršile neophodne izmjene i dopune zakonskih i podzakonskih propisa. Školska 2011./2012. godina mogla bi biti i prelazna godina, u kojoj bi se školovanje izvodilo i po novom i po starom konceptu<sup>10</sup>.

### ZAKLJUČAK

Analizirajući sisteme obuke zemalja sa razvijenom policijskom obukom, kao i dosadašnje koncepte policijske obuke u Bosni i Hercegovini, može se zaključiti da je prihvatljiv novi koncept dvogodišnje policijske obuke. Takav koncept školovanja imao bi za rezultat osposobljavanje policajaca za efikasno suprotstavljanje svim oblicima kriminala u zajednici.

Policijska akademija u Sarajevu je organizaciono, kadrovski, infrastrukturno spremna da dosadašnje reformske rezul-

tate i iskustva usmjeri prema novom konceptu školovanja policije.

- Ovi uvjeti propisani su podzakonskim aktima za svaki policijski organ pojedinačno.
- Prema zakonima o policijskim službenicima konačan izbor i listu polaznika za obuku na Policijskoj akademiji sačinjavaju policijski organi za čije potrebe se vrši njihovo školovanje.
- Osnovna policijska obuka za čin "mlađi inspektor" otpočela je 2005. godine i mogla bi se provoditi po važećem šestomjesečnom konceptu jer kvalitativno i sadržajno zadovoljava potrebe koje se od nje očekuju.
- Osnovna zamisao novog koncepta – prelazak sa "kvantiteta" na "kvalitet" školovanja polaznika.
- Kraći način obuke predstavlja manje ekonomske troškove za policijski organ za koji se polaznici školuju. Jednogodišnji koncept pružio je veliki doprinos u uspostavi profesionalne multietničke policije u Bosni i Hercegovini, naročito za vrijeme mandata UNMIBH/IPTF-a.
- Četiri godine srednje civilne škole (IV stepen stručne spremlje), uz jednu godinu osnovne policijske obuke na Policijskoj akademiji – ukupno 5 godina.
- Nakon jedne do dvije godine rada kao "policajac" slijedilo bi nekoliko mjeseci specijalističke obuke za određenu užu oblast policijskog rada (krim-policija, saobraćaj, krim-tehnika i sl.).
- Nakon završetka školovanja policajci mogli bi raditi u policiji, finansijskoj policiji, inspekcijom, poreskim i carinskim organima, privatnim agencijama za sigurnost, detektivskim agencijama, zatvorima i sl.
- Dvogodišnje školovanje moglo bi se zasnivati na konceptu: 10 mjeseci teorijske nastave + 12 mjeseci praktične nastave + 2 mjeseca teorijske nastave sa završnim ispitom, tj. koncept 10 + 12 + 2 mjeseci;
- U Policijsku akademiju upisivalo bi se svake godine od 2 do 4 odjeljenja polaznika, što je dovoljno za potrebe policijskih organa. U odnosu na broj policajaca u FBiH te na postojeće osipanje i fluktaciju kadrova, minimalno očekivani broj polaznika iznosi 150 do 200 godišnje;

Nelegalno oružje predstavlja najvidljiviji izraz organizovanog kriminala

## Završen nacrt Zakona o oružju i municiji



vatreng oružja.

Nažalost, ova problematika ne bi bila ovako izražena da postoji Zakon o oružju i municiji na nivou BiH. Iako je urađen nacrt Zakona o oružju i municiji BiH, ovaj prijedlog nije prošao parlamentarnu proceduru.

Sve bi bilo donekle lakše kada bi postojao ovaj zakon na federalnom nivou, jer iako svi kantoni imaju svoj Zakon o nabavljanju, nošenju i držanju oružja, ipak postoje problemi.

Naime, u Kantonu Sarajevo nelegalno nošenje oružja je krivično djelo, dok je u Zeničko-dobojskom kantonu to

prekršaj.

Međutim, najveći problem je što se nelegalno oružje koristi kao sredstvo izvršenja u krivičnim djelima kao što su ubistva, pokušaji ubistava, razbojništva i slično.

Nelegalno oružje, na neki način, predstavlja najvidljiviji izraz organizovanog kriminala. I to onoga koji ubija i koji kod građana proizvodi osjećaj nesigurnosti.

Stoga je u oktobru 2009.god., rješenjem federalnog ministra unutrašnjih poslova Muhidina Alića, formirana Radna grupa za izradu nacrt zakona o oružju i municiji. Članovi ove radne grupe su predstavnici Federalnog i svih kantonalnih ministarstava unutrašnjih poslova.

Nakon dva mjeseca rada Zakon o oružju i municiji je završen. Sačinjen je nacrt Zakona i istovremeno je pokrenuta procedura za traženje saglasnosti od kantona da se ovaj Zakon donese na nivou Federacije BiH.

obratiti pažnju prilikom kontrole i pregleda vozila te kada i koje putne pravce treba pokrivati sa saobraćajnim patrolama i kontrolama.

3. Ma kako zvučalo izrađivano, insistirati na kvalitetnom obavljanju uviđaja gdje god je to moguće, kako na licu mjesta i zvršene krađe vozila tako i na licu mjesta pronalaska otuđenog vozila. Ovdje posebno skrećemo pažnju na mogućnosti identifikacije

U pozitivne rezultate treba uvrstiti i realizaciju CIPS projekta u vezi sa registracijom otuđenih i registriranih motornih vozila u BiH, što je od 2007. godine značajno olakšalo borbu protiv autokriminala te započetu praksu firmi koje se bave tehničkim pregledom vozila o obaveznosti dovoženja i stvarnog pregleda vozila.

Autor je svjestan da za najveći broj navedenih prijedloga i preporuka već duže vrijeme postoji konsenzus među policijskim službenicima, ali da je implementiranje navedenih prijedloga i preporuka, baš kao i u drugim brojnim oblastima, bio i ostao najveći problem u BiH.

počinilaca na osnovu tragova papilarnih linija kao i tragova biološkog porijekla putem DNK-a analize, a što se ne koristi u mjeri u kojoj je to moguće.

4. Na sve moguće načine zalagati se za oštiju i blagovremenu kaznenu i procesnu politiku posebno prema višestrukim povratnicima u vršenju ovih krivičnih djela, odnosno prema izvršiocima više krivičnih djela ove vrste. U tom kontekstu, gdje god je to moguće i potrebno, predlaganjem i valjanim obrazloženjima policija treba insistirati i na određivanju mjere pritvora, jer je nedopustivo da profesionalni kradljivci motornih vozila boraveći na slobodi dok im traje krivični postupak nastavljaju sa činjenjem ovih krivičnih djela.
5. S obzirom na to da se jedan broj autootpada u BiH u značajnoj mjeri pretvorio u depoe za otuđena vozila i otuđene autodijelove, treba ih kao takve identificirati i što češće i temeljitije kontrolirati i nadzirati. Radi njihovog zatvaranja prilikom pretresanja tih lokacija, obavezno treba angažirati i nadležne inspeksijske organe. Poučeni dosadašnjim iskustvima policija, a posebno tužilaštvo trebali bi na efikasniji način insistirati kod suda da se ovakvi predmeti što brže rješavaju s obzirom na uobičajenu zatrpanost policije oduzetim predmetima prilikom i nakon pretresanja ovih lokacija.
6. U dokumentiranju slučajeva autokriminala više nego do sada istraživati lanac kriminalne mreže, odnosno ulogu i povezanost članova kriminalne grupe i na taj način gdje god je to moguće slučaj, iz više razloga, procesuirati kroz inkriminaciju „Zločinačka organizacija“.
7. Radi poštovanja načela operativnosti u kriminalističkom istraživanju velikog broja slučajeva autokriminala, neophodna je tijesna suradnja, odnosno zajednički rad policije i tužilaštva na način da će tužiocima morati biti u mogućnosti da u vrlo kratkom vremenu, ako treba za sat ili dva, osiguraju potrebne naredbe i tako brzo reagiraju povodom dobijenih saznanja, odnosno zahtjeva. Ova pravovremena reakcija podrazumijeva oslanjanje na usmene zahtjeve ovlaštenog službenog lica za pretresanje određenih lokaliteta i brzu komunikaciju i razmjenu informacija sa prvim susjednim policijskim

organom te Graničnom policijom BiH.

8. S obzirom na posljednje izmjene ZKP-a FBiH (član 131.), policija u dogovoru sa nadležnim tužiocima sada ima značajno veći manevarski prostor za predlaganje korištenja posebnih istražnih radnji, što znači da se te radnje, u istraživanju autokriminala, trebaju praktimirati češće nego do sada.
9. Federalna uprava policije, na bazi dobijenih informacija o stanju i nosiocima autokriminala u FBiH, treba više nego do sada prema KMUP-ovima uzvraćati povratnim informacijama, analizama, inicijacijama za poduzimanje određenih mjera i radnji. Osim toga, Federalna uprava policije, odnosno Odjeljenje za borbuprotivorganiziranog i međukantonalnog kriminala, treba sve više preuzimati vodeću ulogu u obavljanju i koordiniranju istragama koje imaju obilježja međukantonalnog i međuentitetskog autokriminala i češće nego do sada organizirati radne sastanke radi dogovaranja i harmoniziranja mjera i radnji protiv autokriminala u FBiH.
10. Provesti medijsku kampanju radi osnaživanja građana, a posebno oštećenih građana da se ne upuštaju u samoinicijativne otkupe vlastitog otuđenog vozila preko kriminalne mreže, već da grade povjerenje i suradnju sa policijom

Ukupnoj neefikasnosti u ovoj oblasti doprinosila je i činjenica da se Tužilaštvo BiH nikada nije htjelo baviti slučajevima autokriminala ma koliko ti slučajevi imali obilježja organiziranog, odnosno međudržavnog kriminala. Obrazloženje za takvo postupanje bilo je u faktu da osnovno krivično djelo krađe vozila koja se kvalificira kao „Teška krađa“ nije propisano u KZBiH. S druge strane još uvijek je primjetna različita praksa u spremnosti tužilaca, odnosno sudova da izdaju saglasnosti, odnosno naredbe za pretresanja na području drugog entiteta.

organiziraju otkupe vozila. Nedopustivo je da su široj javnosti općepoznata lica koja posreduju i organiziraju otkupe otuđenih vozila a da ih policija i tužilaštvo ne tretira u svojim istragama i da prema njima ne primjenjuju određene mjere i radnje pa čak i posebne istražne radnje.

#### O AUTORU:

Edin Vranj od 2005. godine obavlja dužnost načelnika Odjeljenja za borbu protiv organiziranog i međukantonalnog kriminala u FMUP-u.

Završio je Srednju školu unutrašnjih poslova u Sarajevu, smjer kriminalističke tehnike, Višu školu unutrašnjih poslova u Beogradu, Fakultet bezbjednosti u Skoplju, a magisterij na Fakultetu kriminalističkih nauka u Sarajevu.

U policijskoj službi - krim-policiji radi od 1984. godine. Pohađao i završio veći broj specijalističkih kurseva i seminara iz oblasti sprečavanja i otkrivanja raznih vidova kriminala u zemlji i inozemstvu.

IN MEMORIAM

## Zvonimir Slipčević Zvonko (1969.-2008.)



Zvonimir Slipčević (u sredini)

Zvonko je rođen u Parizu 1. 12. 1969. od oca Franje i majke Carmine. U periodu od 1992. do 1994. godine bio je pripadnik Odreda za specijalna dejstva Petog korpusa Armije BiH, nakon čega prelazi u 501. slavnu brdsku brigadu, gdje ostaje do 7. 4. 1996. godine.

Za vrijeme ratnih djelovanja ranjen je dva puta i to 1992. i 1993. godine, što ga nije spriječilo da nastavi aktivno učestvovanje u borbi za obranu RBiH.

Nakon rata završio je Policijsku akademiju u Sarajevu 2000. godine, a po završetku je zasnovao radni odnos i bio raspoređen u Jedinicu policije za podršku MUP-a USK.

Kao jedan od najboljih i najsvestranijih pripadnika Jedinice policije za podršku, bio je ronilac „CMAS“ sa tri zvijezde kao samostalni ronilac, TDI - Advanced Trimix

Instructor i SDI – instruktor trener, alpinista, padobranac, poznavao je više borilačkih vještina, a govorio je i nekoliko stranih jezika.

Zbog izuzetne uvježbanosti i obučenosti bio je jedan od dvanaesterice bosanskohercegovačkih policajaca koji su imali privilegiju i čast da predstavljaju našu državu i učestvuje u mirovnoj misiji Ujedinjenih naroda na otoku Haiti kao član „SWAT“ tima.

Zvonko je zajedno sa nekoliko kolega iz Francuske, Kanade i Čilea bio zadužen za obuku pripadnika lokalne specijalne policije, a pored obuke učestvovao je tokom boravka od godinu dana na Haitiju, u raznim operacijama i rješavanju brojnih talačkih kriza u siromašnim četvrtima tromilionskog glavnog grada Port au Prince.

Dana 15. 10. 2008. godine kao pripadnik Jedinice za podršku, prilikom izvršavanja službenog zadatka hapšenja odbjeglog kriminalca i ubice, u rejonu Podzvizda u općini Velika Kladaša zadobio je smrtonosne povrede.

Sahranjen je na Rimokatoličkom groblju u mjestu Vrkašić u Bihacu.

## Amir Avdić (1974.-2009.)



Policajac Amir Avdić (35), iz Zenice, nastradao je 26. decembra 2009. godine prilikom obavljanja redovnih poslova i zadataka. Avdić je bio pripadnik Policijske stanice Crkvice.

Prilikom obavljanja redovnih policijskih poslova, Avdić je 26. decembra 2009. godine dvadesetak minuta iza ponoći pokušao da zaustavi vozilo Yugo, kojim je upravljao Semir Duvnjak (19) iz Zenice.

Duvnjak, koji je vozio pod djelovanjem alkohola, nije se zaustavio i nakon što je udario Avdića.

Usljed siline udara Avdić je zadobio teške tjelesne povrede opasne po život. Nekoliko sati nakon što je povrijeđen na radnom mjestu, Avdić je izgubio životnu bitku u Kantonalnoj bolnici Zenica.

Amir Avdić je sa 19 godina stupio u redove Oružanih snaga BiH, a 1994. godine prelazi u Rezervni sastav polici-

je, odnosno Jedinicu za posebne manevre pri tadašnjoj Stanici javne bezbjednosti Zenica. Dvije godine kasnije zasniva radni odnos kao policajac u Policijskoj stanici Centar i Policijskoj stanici Crkvice.

Na posljednjem ispraćaju njegove kolege su kazale da je Avdić u više navrata samoinicijativno učestvovao u hvatanju izvršilaca krivičnih djela te je pomagao kolegama i kada je bio van službe, za šta je pohvaljivan više puta.

Poslove policajca je obavljao savjesno i profesionalno, ne štedeći sebe u naporima da dosljedno primjenjuje zakon i kazni njegove prekršioce.

Na tom časnom ali nadasve teškom zadatku, braneći vrijednosti za koje danas mnogi ne mare, on je dao svoj život. Upravo za te vrijednosti se obavezao i položenom policijskom zakletvom.

„Amir nas je ostavio da nastavimo tamo gdje je on stao, da završimo ono što je on započeo i da budemo još istrajniji u borbi protiv kriminalaca i zločinaca. Sigurni smo da ćemo u toj namjeri biti još jači“, rečeno je na dženazi tragično nastradalog zeničkog policajca Amira Avdića.

**KORUPCIJA TI UZIMA SVE!  
PRIJAVI SLUČAJ**



**USUDI SE!**

[www.krimolovci.ba](http://www.krimolovci.ba)